

## ԺԱ.

Արդվին եւ Խատիլա:

Որջնահաղից (Որջոխից) դէպի հիւսիս ձորոխը օձապտոյտ դալարումներով ուղղում է դէպի արեւելեան-հիւսիս, ապա արեւմտա-հիւսիս մինչեւ Սինկոտի եւ Իսրայի խառնունքը, երեսուն կիլոմետրի շափ, որը կազմում է Արդվինի շրջանը: Այս շրջանում Շաւչէտ-Իմերխեւ վտակն աջից ընդունելուց յետոյ, ձախից ընդունում է Խատիլա վտակը, որը նոյնպէս 30 կիլոմետր երկարութիւն եւ ընդարձակ աւազան ունի:

Ձորոխը Կապաններից մտնում է Որջոխամբոցը, որ ո՛չ միայն անառիկ է, այլ անմերձենալի. իրար վրայ բարձրացած սրահող լեռները-ապառաժները որեւէ ծիր, աճ ան էլ չունին անցնելու: Ահեղագոչ եւ սրընթաց ձորոխը այդտեղ խոր ձորից այնպէս է անցնում, որ ափերին չի կարող մտնել որեւէ նաւակ, մակոյկ կամ տոփ եւ այդ տեսարանը բաւական է այնպիսի սարսափ սփռելու, որ ո՛չ ոք չի յանդգնի խուժել այդ երկիրը:

Որջոխից երկու կիլոմետր ցած աջից ձորոխն են թափւում երկու առու—Գուրօցան, Բէյջուր. ապա Վասիխսեւ եւ Գեավիլ առունները: Գեավիլի դէմ առ դէմ ձախից խառնւում է ձորոխին Իշխալբուր (Իշխանբուր), իր ոռոգած ընդարձակ այգեստան-